

## Dunna Cresenzia Fichtl-Bear, Sviz



Ils 6 da mars 1982 ei stau sil grond santeri da Sviz la sepultura da dunna Cresenzia Fichtl-Bear. Sia schlatteina Beer muossa vi sin siu origin da Tujetsch. Ina delegaziun ord la parentella da Tujetsch ha dau la davosa honur alla cara «onda Carsenzia», sco ella vegneva numnada. Dunna Cresenzia Fichtl-Bear ei morta ella aulta vegliadetgna da 96 onns e dus meins sco la davosa dad 8 affons dalla famiglia da Giachen Martin Bear e

Maria Ludivina, nata Jacomet. Entochen 1980 eis ella veginida regularmein si Rueras en sia casa paterna. Leu haveva ella – cun ses affons e pli tard cun ses beadis – las pli bialas vacanzas.

La cara defuncta ei naschida igl emprem da schaner 1886 ed ha frequentau las scolas a Rueras. Cumpatg ch'ei plascheva buca ad ella da far la pura ed aschia ha ella dumandau ses geniturs, sch'ei detti atgnamein per ina buoba mo la clamada da pura. Cheu han ils buns geniturs manegiau, ch'ei detti bein autres clamadas, mo lu stoppi ella ir naven dalla patria. La Cresenzia ha elegiu quella via ed ei stada ils emprems onns da sia giumentetgna en piazza a Trun, lu sco cameriera a Lucerna e – per emprender il franzos – a Losanna e Nizza. Duront l'emprema uiara mundiala eis ella maridada cun Adalbert Fichtl, in Tujetsch, che ha stuiu ir liung temps en survetsch militar alla frunt. Quels onns, baul en Svizra, baul en Tiaratudestga, liung temps senza novas dil mariu, ein stai grevs onns per la giuvna famiglia.

Suenter l'emprema uiara mundiala ei la famiglia secasada en Svizra centrala, il davos ad Arth, Seewen e Sviz.

Siu um, in um fetg prudent e honzeli, ei forsa aunc en memoria sco viagiatur da maschinas da cuser e da medischinas per dar forza (per dar «Kraft»!). El ha gia stuiu murir naven da sia famiglia cun in fegl e duas feglias gia igl onn 1947. Dapi lu ha l'onda Cresenzia adina saviu star tier sia feglia Winny Mächler, cun siu mariu e 4 affons. La tatta en buna possa fageva massa lavour, haveva senn per humor e surtut – entochen sia aulta vegliadetgna – peda per in iass. Tier il riug da bara ha il sur plevon da Sviz punctuau specialmein sia fideivladad religiusa. Sco ina dama aristocrata vegneva ella di per di en baselgia. Sia cumparsa era veramein aristocrata el meglier senn dil plaid – siu cor haveva ina cardientscha affonila, che ha teniu petg a tuts stempraus en sia veta, era en siu davos pitir e murir.

Dunna Cresenzia Fichtl-Bear haveva fetg bien contact cun ils Romontschs a Sviz e tuttavia cun sia patria tuatschina. Ella purtava adina «enzatgei bien» e resta' perquei a tuts quels che han enconuschiu ella en buna memoria sco la buna «onda Carsenzia». RIP

Chr. M.